

BOSNA I HERCEGOVINA
FEDERACIJA BOSNE I HERCEGOVINE
UNSKO SANSKI KANTON
GRAD BIHAĆ
GRADONAČELNIK

Broj: _____

Bihać, _____

Na osnovu člana 140. Poslovnika o radu Gradskog vijeća (Službeni glasnik Grada Bihaća broj 3/16, 4/20), Gradonačelnik, u svojstvu predlagača odluka i drugih akata

O d r e đ u j e

I z v j e s t i o c a mr. sci Alisu Mahmutagić, Pomoćnika gradonačelnika za opću upravu i društvene djelatnosti na sjednici Gradskog vijeća i radnim tijelima po prijedlogu tačke dnevnog reda:

Prijedlog Odluke o dodjeli stipendija u akademskoj 2022./2023. godini.

GRADONAČELNIK
Elvedin Sedić

**BOSNA I HERCEGOVINA
FEDERACIJA BOSNE I HERCEGOVINE
UNSKO – SANSKI KANTON
GRAD BIHAĆ
GRADONAČELNIK**

Broj: _____

Bihać, _____

GRADSKO VIJEĆE

PREDMET: Prijedlog Odluke o dodjeli stipendija u akademskoj 2022/2023. godini

Na osnovu člana 52. tačka b) Statuta Grada Bihaća (Službeni glasnik Grada Bihaća br. 13/15, 13/18. 12/22) i člana 140. tačka d) Poslovnika o radu Gradskog vijeća (Službeni glasnik Grada Bihaća br. 3/16, 4/20) u prilogu vam dostavljam Prijedlog Odluke o dodjeli stipendija u akademskoj 2022./2023. godini na razmatranje radi prihvatanja uz sljedeće obrazloženje:

PRAVNI OSNOV ZA DONOŠENJE ODLUKE

Pravni osnov za donošenje Odluke o dodjeli stipendija u akademskoj 2022./2023. godini sadržan je u članu 13. Zakona o principima lokalne samouprave kojim su utvrđene nadležnosti vijeća i članu 35. stav (1) tačka c) Statuta Grada Bihaća kojim je propisano da Gradsko vijeće donosi odluke i druge opće akte kojima uređuje pitanja iz samoupravnog djelokruga i daje njihovo tumačenje.

RAZLOZI ZA DONOŠENJE

Donošenje Odluke o dodjeli stipendija u akademskoj 2022./2023. godini planirano je Planom rada Grada Bihaća kao i Programom rada Gradskog vijeća za 2023. godinu, a sa ciljem da se, u skladu sa raspoloživim budžetskim sredstvima, redovim studentima dodiplomskog studija/ I ciklusa/ Integrisanog studija, sa prebivalištem na području grada Bihaća, olakša studiranje dodjeljivanjem utvrđenog mjesečnog iznosa stipendije. Stipendiranje studenata je u skladu sa utvrđenim strateškim ciljevima Grada Bihaća, te programima društvenog razvoja, u smislu podrške razvoju obrazovanja kroz stipendiranje studenata.

Sredstva za stipendiranje studenata utvrđena su u Budžetu Grada Bihaća („Službeni glasnik Grada Bihaća“ broj 15/22), kod Službe za opću upravu i društvene djelatnosti na stavci *Tekući grantovi pojedincima, isplate stipendija*, organizacioni kod 01/7001000, konto 614234, u iznosu od 100.000 KM.

S obzirom na Budžetom planirani iznos sredstava, predlaže se stipendiranje 50 studenata deficitarnih i ostalih zvanja, sa mjesečnim iznosom stipendije od 200 KM, za deset mjeseci tekuće akademske godine.

U okviru utvrđenog broja korisnika stipendije u članu 3. Prijedloga Odluke, predložen je broj stipendija za studente deficitarnih i ostalih zvanja.

Akt kojim se utvrđuju deficitarna zvanja donosi Gradonačelnik prije raspisivanja konkursa, a na osnovu podataka JU Služba za zapošljavanje Unsko-sanskog kantona, o potrebama zapošljavanja na području grada Bihaća.

Konkurs za dodjelu stipendije raspisuje Gradonačelnik. Konkurs će biti objavljen u jednim dnevnim novinama, na oglasnoj tabli Grada i na web stranici Grada.

Postupak dodjele stipendija po raspisanom konkursu za akademsku 2022./2023. godinu provest će Komisija za dodjelu stipendije koju imenuje Gradonačelnik, na način utvrđen predloženom Odlukom.

FINANSIJSKI EFEKTI

Donošenje ove Odluke izazvat će očekivane finansijske efekte u smislu isplate stipendija korisnicima u skladu sa Budžetom planiranim sredstvima.

S obzirom na navedene razloge, smatram Prijedlog Odluke opravdanim i predlažem da Gradsko vijeće isti usvoji u predloženom tekstu.

GRADONAČELNIK
Elvedin Sedić

Na osnovu člana 13. Zakona o principima lokalne samouprave u Federaciji BiH („Službene novine Federacije BiH“, broj 49/06 i 51/09) i člana 35. stav 1. tačka c) Statuta Grada Bihaća („Službeni glasnik Grada Bihaća“, broj 13/15 i 13/18, 12/22) Gradsko vijeće Grada Bihaća na _____ sjednici održanoj dana _____ 2023. godine, donosi:

ODLUKU O DODJELI STIPENDIJA U AKADEMSKOJ 2022/2023. GODINI

I OPĆE ODREDBE

Član 1. (Predmet)

Ovom Odlukom utvrđuje se pravo na dodjelu stipendija za akademsku 2022/2023. godinu, sredstava za stipendije, broj stipendija i visina stipendije, uvjeti za sticanje prava na stipendiju, kriteriji za bodovanje kandidata, nadležnost i postupak za dodjelu stipendija, sadržina ugovora o stipendiranju, ostvarivanje i prestanak prava na stipendiju, te druga pitanja od značaja za dodjelu, ostvarivanje i prestanak prava na stipendiju.

Član 2. (Sredstva za stipendije)

Sredstva namijenjena za stipendiranje redovnih studenata obezbjeđuju se u Budžetu Grada Bihaća za 2023. godinu („Službeni glasnik Grada Bihaća“, broj 15/22) planiranim na razdjelu kod Službe za opću upravu i društvene djelatnosti na stavci Tekući grantovi pojedincima, isplate stipendija, organizacioni kod 01/7001000, konto 614234 u iznosu od 100.000,00 KM

II BROJ STIPENDIJA I VISINA STIPENDIJE

Član 3. (Broj korisnika)

(1) U akademskoj 2022/2023 godini stipendirat će se 50 studenata dodjelom stipendije za deficitarna i ostala zvanja kako slijedi:

- a) za deficitarna zvanja za prvu godinu studija 10 stipendija
- b) za deficitarna zvanja za drugu i više godine studija 20 stipendija
- c) za ostala zvanja za prvu godinu studija 10 stipendija
- d) za ostala zvanja za drugu i više godine studija 10 stipendija

(2) Akt kojim se utvrđuju deficitarna zvanja donosi gradonačelnik prije raspisivanja javnog konkursa na osnovu podataka dobivenih od JU Služba za zapošljavanje USK-a.

(3) Ako se ne prijavi dovoljan broj studenata deficitarnih zvanja, stipendije će se dodijeliti studentima ostalih zvanja prema utvrđenoj konačnoj listi.

Član 4.
(mjesečni iznos stipendije)

Visina stipendije utvrđuje se u mjesečnom iznosu od 200,00 KM (dvije stotine konvertibilnih maraka) po studentu za deset mjeseci tekuće akademske godine.

III UVJETI I OSNOV ZA STICANJE PRAVA NA STIPENDIJU

Član 5.
(Pravo na stipendiju)

(1) Pravo na dodjelu stipendije Grada Bihaća (u daljem tekstu stipendija) imaju redovni studenti dodiplomskog/ I ciklusa/ integrisanog studija pod uslovom:

- a) da su državljani Bosne i Hercegovine,
- b) da imaju prijavljeno mjesto prebivališta na području Grada Bihaća u vremenskom trajanju od 6 (šest) mjeseci prije podnošenja prijave za dodjelu stipendije,
- c) da su studenti koji studiraju na javnim visokoškolskim ustanovama na području BiH
- d) da su u tekućoj akademskoj godini prvi put upisali određenu godinu studija
- e) da nisu u statusu apsolvanta,
- f) da nisu korisnici stipendije, kredita ili subvencija za troškove školovanja, smještaja ili ishrane iz Budžeta USK-a ili drugog davaoca,
- g) da nisu zaposleni na određeno ili neodređeno vrijeme,
- h) da nisu stariji od 26 godina.

Član 6.
(Osnov za dodjelu stipendije)

Stipendije se dodjeljuju po kriterijima propisanim ovom Odlukom u postupku provedenom na osnovu javnog konkursa.

IV KRITERIJ ZA BODOVANJE KANDIDATA

Član 7.
(Kriteriji)

Kriteriji na osnovu kojih se obavlja odabir kandidata za dodjelu stipendija su osnovni i dopunski kriteriji.

Član 8.
(Osnovni kriterij)

- Osnovni kriterij je opći uspjeh postignut u školi i na fakultetu koji se odnosi na :
- a) prosjek ocjena za sve godine iz svih predmeta tokom redovnog školovanja, ako se radi o studentima (brucošima) koji prvi put upisuju prvu godinu studija,
 - b) prosjek ocjena svih prethodnih godina studija na visokoškolskoj ustanovi koju pohađa ako se radi o studentima starijih godina studija
 - c) učenik generacije
 - d) nosilac jednog ili više priznanja dodijeljenog od kantonalnih, federalnih ili državnih institucija vlasti,

Član 9.
(Dopunski kriterij)

Dopunski kriteriji su socijalni status studenta koji se dokazuje javnim ispravama nadležne institucije.

Član 10.
(Postupak bodovanja-osnovni kriterij)

Bodovanje kandidata po osnovnim kriterijima iz člana 8. ove Odluke vrši se na slijedeći način:

a) Za studente (brucoše) koji prvi put upisuju prvu godinu studija :	Bodovi
- ako je prosjek ocjena sva četiri razreda srednje škole do 3,00	1
- ako je prosjek ocjena sva četiri razreda srednje škole od 3.01 do 3,50	2
- ako je prosjek ocjena sva četiri razreda srednje škole od 3.51 do 4,00	4
- ako je prosjek ocjena sva četiri razreda srednje škole od 4.01 do 4,50	6
- ako je prosjek ocjena sva četiri razreda srednje škole od 4.51 do 4,80	8
- ako je prosjek ocjena sva četiri razreda srednje škole od 4.81 do 5,00	10
b) učenik generacije	50
c) ako je nosilac jednog ili više priznanja dodijeljenog od kantonalnih, federalnih ili državnih institucija vlasti .	5
d) Za studente starijih godina studija :	Bodovi
- ako je prosjek ocjena prethodnih godina studija do 6,50	1
- ako je prosjek ocjena prethodnih godina studija od 6,50 do 7,00	2
- ako je prosjek ocjena prethodnih godina studija od 7,01 do 7,50	4
- ako je prosjek ocjena prethodnih godina studija od 7,51 do 8,00	6
- ako je prosjek ocjena prethodnih godina studija od 8,51 do 9,00	8
- ako je prosjek ocjena prethodnih godina studija preko 9,00	10

Član 11.
(Postupak bodovanja –dopunski kriterij)

(1) Bodovanje kandidata po dopunskim kriterijima iz člana 9. ove Odluke vrši se na slijedeći način:

	Bodovi
- student je lice bez oba roditelja	6
- student je lice bez jednog roditelja	5
- student pripada porodici koja prima socijalnu pomoć	4
-student ili roditelj je invalid sa utvrđenim procentom invaliditeta 60% i više	3
-student je dijete pripadnika boračke populacije	2
-za svako dijete u porodici	1

(2) Dijete označava osobu mlađu od 18 godina .

V NADLEŽNOST I POSTUPAK ZA DODJELU STIPENDIJE

Član 12. (Raspisivanje konkursa)

(1) Stipendije se dodjeljuju na osnovu provedenog javnog konkursa kojeg raspisuje gradonačelnik.

(2) Konkurs se objavljuje u jednim dnevnim novinama, oglasnoj ploči Grada Bihaća i web stranici Grada Bihaća.

(3) Sve stručne, administrativne i pomoćne poslove u vezi sa pripremom i objavljivanjem konkursa obavlja Služba za opću upravu i društvene djelatnosti.

Član 13. (Sadržaj konkursa)

Konkurs za dodjelu stipendije sadrži:

- a) naziv tijela koje raspisuje konkurs
- b) rok za podnošenje prijave na konkurs
- c) označenje akademske godine za koju se dodjela stipendija vrši
- d) broj korisnika i visinu mjesečnog iznosa stipendije,
- e) naziv i adresu tijela kojem se prijava podnosi
- f) opće uslove za dodjelu stipendije
- g) dokaze koje treba priložiti uz pisani zahtjev za dodjelu stipendije,
- h) trajanje stipendije
- i) prava i obaveze stipendiste
- j) obavijest da će na oglasnoj ploči Grada Bihaća biti objavljen prijedlog liste za dodjelu stipendija i rok za podnošenje prigovora.

Član 14. (Podnošenje prijave)

(1) Prijava za dodjelu stipendije i obavezna dokumentacija koja se uz prijavu prilaže propisana članom 15. ove Odluke podnosi se u zatvorenoj kovrti Službi za opću upravu i društvene djelatnosti Grada Bihaća putem pisarnice ili putem pošte u roku od 15 dana od dana objavljivanja javnog konkursa.

(2) Obrazac prijave na Javni konkurs za dodjelu stipendije kandidati mogu preuzeti u Centru za pružanje usluga građanima -šalter sali Grada Bihaća ili sa web stranice Grada Bihaća.

Član 15. (Potrebna dokumentacija)

(1) Uz prijavu iz člana 14. ove Odluke podnosilac je dužan priložiti sljedeću dokumentaciju:

- a) uvjerenje o državljanstvu BiH ,

- b) uvjerenje o redovnom upisu na fakultet za tekuću akademsku godinu, odnosno da su prvi put upisali akademsku godinu za koji se dodjeljuje stipendija koje ne smije biti starije od 3 mjeseca,
- c) ovjerenu kopiju svjedočanstava srednje škole za sva četiri razreda za studente prve godine studija,
- d) potvrdu fakulteta o ostvarenom prosjeku ocjena prethodnih godina studija za studente starijih godina studija,
- e) PBA-1 obrazac MUP USK-a Bihać, odnosno potvrdu o prebivalištu izdanu poslije datuma objave konkursa,
- f) ovjerena lična izjava data pod punom materijalnom i krivičnom odgovornošću da ne prima stipendiju, kredit, da nije korisnik subvencije za troškove smještaja ili ishrane za tekuću akademsku godinu od drugog davaoca,
- g) ovjerena lična izjava data pod punom materijalnom i krivičnom odgovornošću da nije zaposlen na određeno ili neodređeno vrijeme.

(2) Uz prijavu na konkurs kandidati mogu priložiti i posebne dokaze o socijalno-materijalnom stanju .

- a) dokaz o posebnim porodičnim prilikama (bez jednog ili oba roditelja),
- b) dokaz o invalidnosti studenta ili roditelja 60 % i više,
- c) dokaz o primanju socijalne pomoći
- d) dokaz o pripadnosti boračkoj populaciji,
- e) kućnu listu.

(3) Potrebna dokumentacija se predaje u originalu ili u ovjerenj fotografiji. U suprotnom će se smatrati da prijava nije potpuna i ista se bez razmatranja odbacuje.

Član 16. **(Komisija za dodjelu stipendija)**

(1) Gradonačelnik rješenjem imenuje Komisiju za dodjelu stipendija (u daljem tekstu Komisija).

(2) Komisiju čine tri člana iz reda zaposlenika Gradskog organa uprave grada Bihaća.

(3) Provedbu postupka konkursa, bodovanje, rangiranje kandidata i utvrđivanje prijedloga liste studenata za dodjelu stipendije obavlja Komisija .

(4) Komisija za svoj rad odgovara gradonačelniku.

(5) Komisija za dodjelu stipendija radi u sjednicama .

(6) Komisija odlučuje većinom glasova od ukupnog broja članova.

(7) O radu Komisije sastavlja se zapisnik.

Član 17.
(Rad Komisije)

(1) Komisija preuzima zaprimljene prijave za dodjelu stipendija, otvara ih, utvrđuje njihovu formalnu ispravnost i saglasno kriterijima utvrđenim ovom Odlukom vrši bodovanje kandidata koji ispunjavaju konkursne uslove za ostvarivanje prava na stipendiju.

(2) Komisija nakon obrade svih zaprimljenih prijava utvrđuje Prijedlog liste studenata za dodjelu stipendija za deficitarna i ostala zvanja.

(3) Sastavni dio liste iz prethodnog stava ovog člana je i lista studenata koji nisu ostvarili pravo na dodjelu stipendije.

Član 18.
(Pravo prvenstva za dodjelu stipendije)

(1) Ukoliko dva ili više kandidata za dodjelu stipendije ostvare isti broj bodova prednost se daje kandidatu koji ostvari veći broj bodova po kriterijumu socijalnog statusa.

(2) Ukoliko se i na taj način ne može utvrditi redoslijed kandidata prednost se daje kandidatu koji ostvari veći broj bodova po prosjeku ocjena.

Član 19.
(Prijedlog liste studenata za dodjelu stipendija)

(1) Prijedlog liste studenata za dodjelu stipendija sadrži redni broj, prezime i ime kandidata, ime jednog roditelja, te ukupan broj bodova iskazan kao zbir bodova po osnovnim i dopunskim kriterijima za bodovanje.

(2) Prijedlog liste studenata za dodjelu stipendija objavljuje se na oglasnoj ploči Grada Bihaća u roku od 30 dana od dana isteka roka za podnošenje prijave.

Član 20.
(Pravo prigovora)

(1) Svi učesnici javnog konkursa mogu izjaviti prigovor na Prijedlog liste studenata za dodjelu stipendija Komisiji za žalbe Gradskog vijeća Grada Bihaća (u daljem tekstu Komisija za žalbe) putem Službe za opću upravu i društvene djelatnosti u roku od 8 dana od dana objavljivanja Prijedloga liste studenata za dodjelu stipendija na oglasnoj ploči Grada Bihaća.

(2) Prigovor se podnosi putem pošte ili se predaju neposredno u pisarnicu Grada Bihaća.

Član 21.
(Rad Komisije za žalbe)

(1) U postupku odlučivanja po prigovoru na utvđen Prijedlog liste studenata za dodjelu stipendija Komisija za žalbe će:

- a) donijeti rješenje kojim će neblagovremene prigovore odbaciti bez razmatranja,
- b) donijeti rješenje kojim će neosnovane prigovore odbiti,

c) donijeti rješenje kojim će prigovore za koje utvrdi da su osnovani uvažiti i na osnovu istog sačiniti Konačnu listu studenata za dodjelu stipendija koja će biti objavljena na Oglasnoj ploči Grada Bihaća.

(2) Konačna lista studenata za dodjelu stipendija koju utvrdi Komisija za žalbe je konačna i osnov je za zaključivanje ugovora o stipendiranju.

Član 22. **(Rok za donošenje rješenja)**

Komisija za žalbe dužna je donijeti rješenje o prigovoru u roku od 15 (petnaest) dana po isteku roka za podnošenje prigovora .

Član 23. **(Korisnici stipendije)**

(1) Korisnici stipendije u akademskoj godini za koju se konkurs raspisuje su kandidati na utvrđenoj Konačnoj listi studenata za dodjelu stipendija sa najvećim brojem bodova do broja korisnika stipendije utvrđenom ovom Odlukom.

(2) Korisnik stipendije je dužan obavijestiti davaoca stipendije o promjeni prebivališta i adresi stanovanja, kao i svim drugim promjenama koje su bitne za korištenje stipendije u roku od 8 (osam) dana od dana nastale promjene.

VI UGOVOR O STIPENDIRANJU

Član 24. **(Zaključivanje ugovora o stipendiranju)**

(1) Sva međusobna prava, obaveze i odgovornosti između sudenata kao korisnika stipendije i Grada Bihaća kao davaoca stipendije regulišu se ugovorom o stipendiranju.

(2) Ugovor o stipendiranju zaključuje se za deset mjeseci tekuće akademske godine.

(3) Po utvrđivanju Konačne liste studenata za dodjelu stipendija Služba za opću upravu i društvene djelatnosti će aktom obavijestiti korisnike stipendije o dodjeli stipendije i datumu potpisivanja ugovora o stipendiji.

(4) Sve stručne, administrativne i pomoćne poslove u vezi sa pripremom ugovora o stipendiranju obavlja Služba za opću upravu i društvene djelatnosti, a poslove oko isplate stipendija obavlja Služba nadležna za finansije .

(5) Služba za opću upravu i društvene djelatnosti vodi evidenciju o zaključenim ugovorima o stipendiranju.

(6) Ukoliko obaviješteni korisnik stipendije odustane od dodjeljene stipendije ili bez opravdanog razloga ne dođe potpisati ugovor o stipendiji u roku od 8 (osam) dana od dana određenog za potpisivanje predmetnog ugovora korisnik stipendije gubi pravo na stipendiju.

(7) Opravdanim razlogom iz stava 6. ovog člana smatra se teška bolest ili nesretan slučaj što je kandidat dužan dokazati određenom dokumentacijom.

(8) Stipendije koje nisu dodjeljene uslijed odustajanja korisnika stipendije od iste ili neodazivanja korisnika stipendije na potpisivanje ugovora o stipendiji dodjelice se sljedećem kandidatu sa Konačne liste studenata za dodjelu stipendija po najvećem broju bodova koji nije ostvario pravo na stipendiju po konkursu.

Član 25. **(Sadržaj ugovora o stipendiranju)**

Ugovor o stipendiranju sadrži sljedeće podatke:

- a) ugovorne strane odnosno njihove zakonske zastupnike i adresu prebivališta
- b) naziv i mjesto visokoškolske ustanove
- c) iznos stipendije
- d) vrijeme korištenja stipendije
- e) način i uvjeti vraćanja stipendije
- f) način rješavanja međusobnih prava i obaveza ugovornih strana
- g) uslove za raskid ugovora i pravne posljedice raskida ugovora
- h) mjesto i datum zaključenja ugovora
- i) potpis ugovornih strana odnosno njihovih zastupnika
- j) druga pitanja od značaja za ostvarivanje i prestanak prava na stipendiju.

VII OSTVARIVANJE I PRESTANAK PRAVA NA STIPENDIJU

Član 26. **(Ostvarivanje prava na stipendiju)**

(1) Stipendija je nepovratna ukoliko ugovorna strana –korisnik stipendije ispuni ugovorne obaveze.

(2) Stipendija se dodjeljuje za razdoblje od deset mjeseci akademske godine, a student ostvaruje pravo na stipendiju od početka akademske godine za koju mu je stipendija dodijeljena.

(3) Isplata stipendije se vrši putem tekućeg računa kandidata otvorenog kod banke.

Član 27. **(Raskid ugovora o stipendiranju)**

(1) Davatelj stipendije jednostrano će raskinuti ugovor o stipendiranju u sljedećim slučajevima:

- a) ako se utvrdi da je korisnik stipendije pravo na stipendiju ostvario na osnovu neistinitih podataka, davanja lažnih izjava ili na osnovu falsifikovanih dokumenata čime je doveo u zabludu davaoca stipendije u pogledu uvjeta za sticanje prava na stipendiju
- b) ako korisnik stipendije u toku trajanja ugovora postane korisnik stipendije, kredita ili drugih oblika subvencije na ime troškova školovanja kod drugog davaoca,
- c) ako korisnik stipendije bude pravosnažno osuđen za krivično djelo za koje mu je izrečena kazna zatvora 3 mjeseca ili duže,

- d) ako korisniku stipendije bude izrečena disciplinska mjera isključivanja iz visokoškolske ustanove i prestanka statusa redovnog studenta
- e) ako korisniku stipendije po nekom drugom osnovu prestane status redovnog studenta
- f) ako je kod korisnika stipendije došlo do značajnih promjena u uvjetima za dodjelu stipendije, kao što je odjava prebivališta sa područja Grada Bihaća i promjena studija za koju je stipendija dodijeljena

(2) Ugovor o stipendiranju se može raskinuti i na pisani zahtjev korisnika stipendije.

(3) Raskid ugovora o stipendiranju se vrši u pisanoj formi.

Član 28. **(Povrat iznosa stipendije)**

(1) U slučaju raskida ugovora o stipendiranju isplaćeni iznos stipendije korisnik stipendije mora vratiti u roku od 30 (trideset) dana od dana raskida ugovora ili po dogovoru ugovornih strana.

(2) Korisnik stipendije koji je izgubio pravo na stipendiju, a koji nije izvršio povrat stipendije u utvrđenom roku gubi pravo na sudjelovanje na konkursu za dodjelu stipendije za naredne akademske godine sve dok ne izvrši povrat cjelokupnog iznosa isplaćene stipendije .

VIII ZAVRŠNE ODREDBE

Član 29. **(Stupanje na snagu)**

(1) Stupanjem na snagu ove Odluke prestaje da važi Odluka o stipendiranju studenata („Službeni glasnik Grada Bihaća“, broj 1/15).

(2) Ova odluka stupa na snagu osmog dana od dana objavljivanja u Službenom glasniku Grada Bihaća.

Gradsko vijeće

Predsjedavajući Gradskog vijeća
Zulfikar Handukić

Broj: _____
Bihać _____